

瑜伽師地論本地分菩薩地真實義品講義二十(2013)

一、四種沙門〔瑜伽卷29〕

沙門復有四種。何等為四？一、勝道沙門，二、說道沙門，三、活道沙門，四、壞道沙門。

●第一義

- 一、當知諸善逝，名勝道沙門；諸善逝者，謂已證得貪瞋癡等無餘永盡。
- 二、諸說正法者，名說道沙門；說正法者，謂為調伏貪瞋癡等，宣說正法。
- 三、諸修善行者，名活道沙門；修善行者，謂為調伏貪瞋癡等，勤修正行。
- 四、諸行邪行者，名壞道沙門；行邪行者，謂犯尸羅，行諸惡法。

●第二義

- 一、又學無學名勝道沙門。

以無漏道摧滅一切見、修所斷諸煩惱故。

- 二、若無如來及諸菩薩，為菩提故勤修正行，諸聲聞眾持三藏者，名說道沙門。任持世俗法毗奈耶，轉正法眼令不斷故。

- 三、若諸異生補特伽羅，其性調善，為自利益勤修正行，有羞有悔，愛樂正學，為得未得、為觸未觸、為證未證勤修加行，有力有能堪得未得、堪觸未觸、堪證未證，名活道沙門。

由彼現有諸善法煖，堪能生長聖慧命根，名活，非死，是故名為活道沙門。

- 四、若諸犯戒補特伽羅，多行惡法，廣說乃至實非梵行自稱梵行，名壞道沙門。由彼破壞最初所有正道根本，無力無能，非生道器。雖現前有說正道教，及現前有證正道者，而彼不得，是故名為壞道沙門。

世尊依彼作如是說：此初沙門，廣說乃至第四沙門，於外沙門、婆羅門教空無所有。若於是處，八支聖道安立可得；即於是處有初沙門，廣說乃至第四沙門。

二、三種婆羅門〔瑜伽卷29〕

婆羅門復有三種。一、種性婆羅門，二、名想婆羅門，三、正行婆羅門。

- 一、種性婆羅門者，謂若生在婆羅門家，從母產門之所生出，父母圓備，名婆羅門。

二、名想婆羅門者，謂諸世間，由想等想，假立言說，名婆羅門。

三、正行婆羅門者，謂所作事決定究竟，已能驅擯惡不善法。如說：當知婆羅門更無有所作；所作事已辦，是謂婆羅門。